

Ө. ЭБДИМАНҰЛЫ

АЗАТШЫЛ РУХТЫ ОЯТҚАН АҚЫН

Қазақ тарихында аумалы-төкпелі заман көп болғаны белгілі. Соның ел басына ауыр салмақ артқан тұсы Ресейге өз еркімен қосылды деп жүрген бодандық ноктасын мойынға еріксіз салған тұс. Осы бір кезеңдегі отаршылдық қармағына ілінген елдін халін алғаш анғарып, жұртына ой салмақ ниетте өлеңіне ел өксігін жүк еткен, Мұхтар Әуезовтің дуалы аузымен «зар заман» ақындары аталып кеткен Дулат, Шортанбай, Мұрат сынды қазақ әдебиетінің ірі тұлғалары еді. «Зар заман деген – XIX ғ. өмір сүрген Шортанбай ақынның заман халін айткан бір өлеңінің аты. Шортанбайдың өлеңі ілгері, соңғы ірі ақындардың барлық күй, сарынын бір араға тұстас-

тырып – гандай жиынды өлең болғандықтан бүкіл бір дәуірде бір сарынмен өлең айтқан ақындардың барлығына «Зар заман» ақындары деген ат қойдық. Бұл ақындардың дәуірі жоғарыда айтқан тарихи дәуірді туғызған дәуір. Зар заман ақындарының алғашқы бұйны Абылай заманынан басталса, арты Абайға келіп тіреледі. Сондықтан қазактың тарихымен салыстырсақ, зар заман дәуірі толық жүз жылға созылады» [1, 194], – деп бастайды өзінің 1927 жылды шыққан атакты «Әдебиет тарихы» кітабының «Зар заман ақындары» бөлімін М. Әуезов. Мұндағы ғұламағалым тұстас дәуірлер әдебиетін тұстас бірліктей алып қарастырып, олардың ара-жігін ашпай, Абайға дейінгі

әдебиетті бір жүйеге біріктіреді. Мұның өзіндік себептері де жоқ емес. М. Әуезов «жүз жылдығы» бұл отаршылдықтың қыспағына түскен жүз жылдық еді. Ал, бұл кезеңді бүтін күйде бөліп-жармай алудың сол уақыттағы халық қасіретін, оның басына түскен ұлы кесепаттың бар болмысын айқындауға мүмкіндік тудырары, түгел сипатын бүтін күйінде бағамдауға қол жеткізетіндігі сөзсіз.

Зар заман ағымын жана сипатта зерттеп, оның әдебиетіміздегі өзінше құбылыс екендігіне терең зерттеулер арқылы қол жеткізген ғалым Б. Омарұлы бұл ағымның өзіндік ерекшелігін белгілі. Омарұлы: «Зар заман жырлары – отаршылдықтың талауына түскен ұлт тағдырының тығырыққа тірелгендігін белгісі» [2, 8]. Яғни М. Әуезовше айтқанда: «... орынса бағынып, ноктаға бас ишп, асаудың жуасып, алыптың басылған уақыты...» [1, 142] келіп, ертengі күнге деген үміт отының сөне бастаған тұсы. Зар заман ақындарының ашызының мәні осында. Отар елдін зар мен мұның жырлап, кешегі еркін күндердін елесін ансан, болашаққа күмәнмен қараған ақындар сөнуге айналған ел руҳының шоғын еткен күндердегі ерліктің өнегесімен үрлеуге ниеттетті. Мына тіршіліктің ел болам дейтін жұрттың жолы еместігін, ел алдында таңдау тұргандығын, екі айрықтың таңдауы ұлттың өз қолында екендігін

жеріне жеткізе айтты. Және ол жырлар, ол сөздер далага кеткен жок, көкейге қонды, ойды оягты, елім деген ердің намысын жаңыды, күреске бастады. Біз оны осынау тарихи кезеңде қазақ даласындағы болған сан түрлі көтерілістерден көреміз.

Әбілқайыр бастаған Кіші жұз рулары Ресей империясының қоластына кіргеннен кейінгі 50 жылдан соң қазақ халқы патшалық Ресейдің шын ниетін нақты сезіне бастады. Тарихи дерек бойынша «1775 жылы патша өкіметі жергілікті басқаруға өзгерістер енгізіп, Орынбор губерниясы жойылды. Оның орнына шекаралық комиссия құрылды. Орал шекаралық желісі қайта қалпына келтіріліп, нығайтылды. 1773–1775 жылдардағы Е. Пугачев бастаған шаруалар көтерілісін ел жадынан шығару үшін Жайық езені Орал езені болып аталауды. 1782 жылғы бұйрық бойынша Еділ-Жайық арасы Нұралы хан мен туыстарының билігіне берілді. Патша өкіметі сұлтандарды өз жоспарларын жүзеге асыруға пайдаланды. Қазақ әскерлерінің қазақ ауылдарына басқыншылық шабуылдары үдей түсті. 1782–1783 жылғы қуанышылық елдің патша өкіметінің рұхсат етуіне қарамай, ішкі жаққа етуіне әкеліп сокты. Осы жағдайлар 1785 жылдың басында бұқараның қарсылық көрсетуіне әкеп сокты» [3, 124–125]. Бұл Ресейге қарсы алғашкы бұлқыныс, Сырым Датұлының көтерілісінің басы еді. Ол кейіннен Жоламан мен Саржаның, Исадай мен Махамбеттің, Кенесарының көтерілістерінен жалғасын тапты. XIX ғ. екінші жартысындағы Жанқожаның, Есектің, Сейіл мен Беркіннің, Досан мен Исаңың көтерілістері осылардың алысқа жеткен жаңғырығы болатын. Бұл көтерілістерге шетелдік ғалымдар да қатты назар аударған. Мәселен қазақ тарихын біршама зерттеңген АҚШ-тың Колгейт университетінің профессоры Марта Олкотт: «Қазақ тарихы туралы неғұрлым дәлелді көзқарасты М. Вяткиннің 1941 жылғы зерттеулерінен алуға болады», – дей келе, «Әрбір көтеріліс келесісіне дем беріп отырды, оның бәрі қазақтардың арасындағы орыстарға деген құшті наразылық сезімінен туындауды, олар орыстарды өз жерінің шаруашылық жағдайының нашарлауының себепшілері деп білді» [4, 102], – деген қорытынды жасайды.

Осынау көтерілістердің әсіресе, Кенесары, Исадай, Жанқожа көтерілістерінің аяусызы жаңышылып тасталуы, зар-заман ақындары шығармашылығына, өзгеше самал беріп, олардың зар мұндары үмітсіздікті күшайте түсті. Мұны Халел Досмұхамедұлы «Болжалдық әдебиеттегі бұндай үмітсіз зарлы сарын әсіресе XIX ғ. екінші жартысында – саяси бостандықтан үміт кесілгенде (Исадайдың, Ке-

несарының т.б. көтеріліс-терінің жаңышылыбы), қазақ жерін отарлау қүшейгенде ... қүшейе түсті» [5, 22]. – деп нақты көрсетеді.

Зар заман әдебиеті қазактың ағы-бері тарихындағы жұз жылдық дәуірді қамтитын ерекше ағым. Қазақ әдебиетіндегі бұл ағым туралы кенестік кезеңде де аз сөз болған жок, бірақ ол жабулы күйде калып, ашық айтылмаған шындық жеріне жете ашылған жок. Мұның себебін Х. Сүйіншәлиев: «Оларды (зар заман ақындарын – Θ.Ә.) түгел әдебиет тарихынан шығарып тастағысы келмеген аға буын әдебиетшілер әр сақта жуғіртіп, өз ойларынан «зар заман» әдебиеті дәуірін шығарып та жүрді. Ресми баспа орындары бұл атауды да қабылдамады. Себебі олардың ойынша, қазақ халқын Россия патшалығының отарлауы, жер, суын жаулап алып, күгінға салуы прогресс, Россияның келешегі оны актады. Соңдықтан отаршылдық дәуірі – «зар заман» – деп атау саяси қате түсінік-міс» [6, 4]. Мұның дәлелін біз мына құжаттан көреміз. 30–40-жылдарда зерттеудегі жаңашыл ой-пікірлердің түбіне жеткен 1947 жылғы қаулы болып табылады. Қазақстан компартиясы Орталық комитетінің атамыш жылдың 21 қантарында шыққан «Қазақ ССР Ғылым академиясының Тіл және әдебиет институтының жұмысындағы саяси өрекшел категер туралы» қаулысы талай ғалымдардың маңдайына бес елі сор болып жабысқан еді. Онда: «Откендері әдебиет өкілдері жалпы халық қайраткерлері болды деп көрсетіледі, ал олардың творчествосы тап куресіне байланыстырылмай, олардың тексеріледі. Сөйтіп, олардың шығармашылығындағы феодалдық, реакциялық, буржуазиялық-ұлтшылдық сарындар қағажу, бүркенде қалдырылады (Базар, Мұрат, Шортанбай, Шәнгерей, О. Қарашев, С. Торайғыров және басқа ақындар)» [7], – деп тайға таңба басқандай етіп жазылған болатын. Әдебиеттің дәлелінде ақтандықтарды ашып жүрген көрнекті ғалым Т. Кәкішев бұл туралы: «1950 жылы оқуды бітіріп, «Мектеп» баспасының оку құралдары редакциясының аға редакторы болды. Міне осы кезде С. Мұқанов, К. Бекхожин құрастырган хрестоматия, Е. Ісмаилов, Х. Жұ-малиев, Ә. Марғұлан т.б. авторлар жазған оқулықтар «астан-кестен» болды. Шортанбай, Мұрат, Дулат, Ғұмар, Шәнгерейлер «Тіл тартпай» кеткен-дердің басы болды. Көкбай, Нұржан, Нармамбет сынды дарындар «сұраусыз кетті»» [8, 95], – деп ашып шындықты ашып айтады.

Әрине, түгел дәуірді бір ағымның аясында қарау әділетсіздік болар еді. «Зар заман» жалпы дәуір сипаты, халық бастан кешкен кезеңнің бейнелі атавы

ал әдеби ағым ретінде ол қазақ әдебиетіндегі бір арнаны танытады. Ол ғасырлардан ғасырларға жаңғасын тапқан қазақ әдебиетіндегі рухани сілкініс азаттыл сарынның бір сипаты ретінде қарастыру керек. Қазақ әдебиет зерттеуінде зар заман ағымын жеке тақырып ретінде алғаш зерттеген ғалым К. Мәдібай: «Зар заманды әдебиеттің тұтастай дәуірі деп емес... оны тікелей орыс отаршылдығы түрлі саяси актілерді іске асыруды максат етіп, ақыры тындырып болған дәуір – отаршылдық дәуір аясындағы әдеби ағым, өзіндік өзгешелік бөлекшілігі бар бағыт ретінде қарастыру, тіпті сол XIX ғ. өзіндегі, XX ғ. басындағы өзгеше бағыт, сарындар мен араластырмау қажет» [9, 16], – деп санайды. Шындығында солай. Бір дәуірде өмір сүргенмен, Дулат пен Махамбет поэзиясының ерекшелігі айқын білініп тұрмай ма?! Дулатта ел қамын ойлаған зар мұн басым болса, Махамбетте жігер жаңыған отты өлең, иілмеген бас, иіні түспеген рух сезіледі.

Әдетте зар заман ақындарын атағанда, Дулат, Шортанбай аттары ауызда алдымен ілінеді, қатарласа жүреді. Тіпті, Абайда әйгілі «Біреудің кісі өлсе, қаралы ол» деп басталатын өлеңдегі де «Шортанбай, Дулатпенен Бұқар жырау» деп, жұп жазбастан бірге жүр. Ендеши зар заман ағымын қалыптастыруда осынау кос ақынның қызметі орасан зор деп білуіміз керек. Олар өмір сүрген кезенге тарихшы көзімен қарасақ: «XIX ғ. алғашқы жартысы – Қазақстан үшін тарихи кезең, яғни саяси, мемлекеттік еркіндіктен біржола айырылып, отарлық ахуалдың, саяси тәуелсіздіктің дәм-тұзын тату кезеніне қадам басу уақыты» [10]. Ал ол идеологиялық тұрғыдан бір өзін-өзі билеген еркін елдікті тұғыр еткен, соны қөксеген ұлы арманның көрінісі еді. Ұлт азаттығын аңсаған патриоттық сезімнен туған үлт поэтикалық жүйе үлт тәндігі туралы тарихи сана қалыптастырыған өзіндік өмір-танымды дүниеге келтірді. С. Мұқанов жалпы XIX ғ. әдебиеті туралы мынадай түйінді тұжырым жасайды: «XIX ғ. алғашқы жартысында үлт бостандығын жырлайтын әдебиет жасады. XIX ғ. 50–70-жылдығында. «Зар заман» әдебиеті басым болды. XIX ғ. 70-жылдарынан бастап просветительдік (мәдениетке үндеуші) әдебиет тұды» [11, 52]. Ендеши, «үлт бостандығын жырлайтын әдебиет» басында өзге емес Дулат ақын тұрды. Кер заманың кермегін тата бастаған елінің күйін ақындық жүргегінің сезімтал-дығымен ұғып, оны өлең-жырының өзегіне айналдыра білген Дулат – уақыттың күнегері де, төрөшісі де. Ол – көргенінен қорытынды жасап, естігенін ой елегінен өткізе біліп, өлең-ге ой түсі-ріп ғана қоймай, ой салмағына орай оның

өрнегін де өзгерте алған ақын. Дулаттағы ой мен өлең тұтастығы, оның қазақ поэзиясын жаңа белеске көтергенінің нақты айғағы. Зар заман атты бағыт Шортанбай өлеңінің атауын алғанмен, оның «атасы» Дулат.

Кешегі бір заманда,
Қасиетті еді хан-қараң.
Мынау азган заманда
Қарасы – антқор, ханы – арам.
Батыры қексер, басы аман.
Бәйбіше – тантық, бай сараң,
Бозбаласы – башалақ,
Қырысаға туды қыз балаң.
Нары – жалқау, кер табан,
Құсы қүйшішіл, ат – шабан
Жыргалаң, жоқ, жобалаң.
Ебі кеткен ел болды,
Енді қайда мен барам? [12, 91].

Бұл Дулат ақын салған азған заманың айқын суреті мен азғындардың қапысыз берілген бейнелері. Мұның астарында көп нәрсе жатыр. Заманың салтын өзгертіп, түрін бұзған кім?! Түңілген жүртты шошындырған не?! Міне, өлеңдегі толғаулы ойдың жауап іздер нәрселері осылар. Оның жауабы – бірлікті ұйытқан білікті тұлға жоқтығы, тәуелсіздікті ту көтерген–білектің аздығы, әділетті ақ жол еткен – бидің кемдігі. Ал осының барін туындаған бас кінәлі – орыс отаршылдығы. Өрісінен мал кеткен, иелігінен жер кеткен, өзінен ерік кеткен ел, мендуана жегендей меніреу күйге түсіп, «құлакқа ұрган танадай» сенделіскен күй кешті. Патшалық өкіметтің әккі саясаты оларды, әкімшіліктің бетіне қараған «құнбағысқа» айналдырыды. Қу заманың құпиясын ашқан Дулат олардың әр қайсысына сипаттама беріп, дәлме-дәл сипаттайды.

Ұлық қысса ұлықты,
Ұласып мидай былықты:
Атқа мінер ауылда,
Итше ілініп ылықты.
Орыстың көрсे ұлығын,
Қыздандағы қылықты.
Ұлық кетсе, қазаққа
Корқау қасқыр құлықты [12, 74].

Дулат – өлең сөздің құпиясын мейлінше терең игерген ақын. Оның сөз ойнату тәсілі айтар оймен өзектес түсіп жатады. Ақын құрғақ сөз, жылтыр құбылмалыққа құмар емес. Ол өз сезінің тындаушыға мейлінше ұғынымды болуын қалайды, соған сай көркем сөздің мәйегін тереді. Сөз сырның мәніне үнілген, ақын-жыраулардың, шеберлік өрнектерін зерттеген ғалым С. Негімов: «Ақын-жыраулар шалқыған шабытын, толқынды ойын, гауырдай құбылған тілін ынталы жүрекпен, ояу

көнілмен ұғынатын тыңдаушыларды тілейтінін мына бір сөздері арқылы байқауға болады» [13, 44], – дей келе мысал ретінде Дулаттың тәмендегі өлең жолдарын келтіреді:

Шешендейтің сәні жоқ,
Сөзіне сүттей ел ұйып.
Қолтығына ел сиып,
Басына бақыт қонбаса [12, 103].

Иә Дулат – көмейіне бұлбұл қонған, сөзіне ел ұйыған ақын. Ол әрбір сөзіне мың батпан жүк артып, ортаға салмағына сай ой тастайды. Ал Дулат өлеңінде ой шыр айналар алтын қазық – ел-жұрттыңын ауыр халін айтуда.

Хан талауда, қамалда,
Қалды кеме қайрақтап
Абылай туы жығылды,
Қабырган қазақ сыйылды.
Үріккен қойдай біріне,
Бірі келіп тығылды.
Батыстан соқты боран боп,
Шығыстан күткен ызғырық [12, 91].

Ақын қазақ басына тәнген қасіреттің бас кінәлсін нақты көрсетеді. Кешегі Абылай заманында шығыспен алысып, бар бәлені сол тұстан күткен ел, батыстың басқа бәле болып жабысарын білген бе еді. Әрине, жоқ! Оған уақыт керек болды. үміт ақталмады. Патша өкіметтің айлапы саясаты ақыры алып тынды. Ел жағдайы мен жер жағдайы үлкен қауіпке душар болды. Отаршылдық саясат – ең алдымен ұлттық рухты жаулауды қолға алды. Діннен айыру, тілден айыру, өзіндік салт-дәстүрді аяқ асты ету, елдің ел болып қалуының екітәлай күнін туғызыды. «Шығыстағы ызғырықтың», «батыстағы боранға» айналуы осы еді. Ақын мұны кеудедегі зар – мұн емес, ыза мен өшпендерлікке толы кекті үнмен толғайды, ашына жырлайды. Бұл М. Өуезов сөзімен айтқанда: «Қазақты патша саясаты билеп алған... отаршылдық әрекеттің күшінде бастаған, діннен айыра бастаған... Сыртқы өмірдің осы сияқты себептерімен қазақтың атына уайым араласқан, көнілі жабығып, қайғы басқан сөзінен, өлеңінен, әнінен бұрынғы билік, еркепік, еркіндіктің бәрі де арыла бастап, оның орнын арман, зар-шер, қайғы басқан» [14, 291] – уақыттың нақты сипатты. Дулат уақыттыңысын дәл анғарып, елдің жай-күйін шынайы көрсетеді.

Дулат тек айтушиға емес, осы күйге елді жеткізген «ерлерді» сынаушы да. Жайғана сынаушы емес, олардың түрін түстеп, ісін бейнелеп, сыртқы кескін-кейіп мен ішкі жан дүниесін қатар ашып, олардың сұрқия тірлігінің халық жадынан еш өшпестей етіп, бедерлеп, бейнелеп беруші. Оның әрбір елдің тізгінін ұстадым деген биліктегі берекесіздерге

берген мінездемесі, әрі өткір сын, әрі өшпестей салынған сурет. Қараңыз азған заманың биі қандай:

Ұлықтың заңын қуаттап,
Жол салып еді суаттап,
Баладай алдаң уатпақ,
Би дегенің би емес,
Ел алдағыш мекері [12, 94].

Бек дегенің:

Шен-шекпенге құмартқан,
Қанталап көзі мұнартқан,
Саудалап елін тынға,
Құмартып ұлық сиына,
Бек дегенің бек емес,
Хан жалшысы нөкөрі [12, 94].

Елдің ендігі атқамінерінің сиқы мынау:

Майырдың алса бұйрығын,
Борбайға қысып құйрығын,
Ел пысығы жортады,
Өзі елді қорқытып,
Онан өзі қорқады [12, 110].

Ал ел сенім артқан, ел тұтқасы дейтін, қазактан шыққан ең үлкен бастық ағасұлтанның түркы мынау:

Қазіргі қазақ ұлыбы,
Жаман иттен несі кем.
Жемтік көрсө, қан көрсө,
Айрылар мүлде есінен.
Сендер атқа мінген соң,
Тандыр болып сұалды,
Шалқар көлдей несібем [12, 67].

Мұны бәрін Дулат кекесін, сықақ етіп емес, шындықтың қанын шығарып жаны ашына да, әлгілердің қылығынан шошына да жырлайды. Себебі ел сенім арқалар ер тұлға езге айналған заманда ертөнгі күнге деген сенім жоғалып, еркіндікке жетер кезеңде көзден бұлбұл ұшады. Дулаттың кейінге қарайлап, ертөнге аландауының да бір сырты осы тұлға жайлы топшылауында, оған көнілі толмауында жатыр. Кешегі хан тұқымының бүгінге жаутаң қақкан сұлтан күйге қалай түскендейтінің себеп-салдарын өзгеден емес, дәл соның өзінен көреді:

Қарағызыз ел мен жүрт,
Төрелік түскен дагына,
Ие болмай айрылдың
Атаның алтын тағына
Қара толқын жау толды
Шығыс, Батыс жағына
Тұлпарлардан тұган тұқым ең,
Ере алмадың жабыға.
Етегін ашып кім күлмес,
Азғындаған шағына [12, 68-69].

Міне осылардың сұлбасынан шошыған Дулат ертеңін түніліп, зар шегеді. Арты келмес, алды түнек заманың тығырықтан шығар жолын таптай-

ды. Күніреніс сыры санаы барға осыны ұғындырады.

Азган елдің адамы
Апшыған сұмдар қадамы
Жүйрікпі деп шабады,
Момынга жапса жаланы
Кұлық-сұмдық табады;
Арқасы елдің жауыр боп,
Женіл жүті ауыр боп,
Төрт аяқтан ақсауы-ай... [12, 64]

Жәй осылай болғанда, үміт оты сөнбегенде қайтпек. Дулат тіптен, түніліске беріліп, келмеске кеткен үмітке үкім де шығарып қояды.

Енді қазақ ел болмас,
Күні етіп, айы ақсан.
Дәрігері дарын болса да,
Ауруға ем қонбас,
Мұйіздескен сиырдай
Байласаң бас жіп жетер ме?! [12, 73-74].

Осында екінші бір мәселе қоса айтылған. Ол соңғы жолда жатыр. Бұл ел бірлігі мәселе. «Мұйіздескен сиыр», «Жетпейтін бас жіп» осыны мензейді. Тұлға мен ел бірлігі Дулаттың зар мен мұнды, көнілдегі күдігі.

Бұзауы өлген сиырдай
Сауын иіп Дулат жүр,
Місі қылыш тұлышты [12, 74], –

деп, зар заман ақыны атанған Дулатты алдағы күнге жетелер нендей күш? Нениң қамы? Ол – отаншылдық рух. Дулат ел күйін айтып, елін еніреткендерді сынағанмен, солардың болмысынан шошынғанмен, отанынан, тұған жерінен, өскен елінен безінбейді. Оған қуат беріп, қызуы шоқтай өлең шығарып, толғандыратын да соның жайы.

Атам қонған кең далам!
Мені сендей қызғанар
Бауырыңда өскен қай балан!
Көл қорыған қызығыштай
Сен десе салам бай-балам...
Өксігінді ойласам –
Үйқы беріп, қайғы алам...
Қылыш-қылыш заман-ды,
Заманға сай адамды
Салғастырып қарасам
Су мүйіз болған танадай
Шырын көбелек айналам [12, 81].

Иә, тұған жер тағдыры Дулат жырының алтын арқауы. Ғалым І. Дүйсенбаевтың тұжырымынша: «... ақынның осы шығармасындағы (Ата қоныс Арқадан – Θ.Θ.) негізгі сарын қалған тол-ғауларының көпшілігінде кайталанып, кейде толықтырылып, кейде қүшетіліп отырады» [15, 38]. Осы өлендегі ерекше бір өзгеше сипатты зерттеуші А. Шөріп еті жақсы аңғарып жете ба-йыптай білген: «... тағы бір

назар аударатын жанрлық жаңалық: тұған жер туралы туындының әдеттегіше қоштасу немесе еске алу түрінде емес, қоныспен түгелдей сырласуға құрылған арнау үлгісінде шығарылғандығы» [16, 49].

Ақын осынау тұған жермен сырласуындағы өкінішпен қайғының құрсауында қалып қоймай, үміт отын жаға алған. Ол иесі азғанмен, киесі кетпеген тұған жердің келісті көркем суретін жасап, жүрекке түрлі ой салады.

Ақжайлау мен Сандықтас,
Атамың қонған қонысы.
Тұн асса тұтам түгі өскен
Басылмайтын сонысы.
Аққан бұлақ сай-салан,
Шытырман тоғай айналаң,
Жаның жайлау кең алан...

Ой, Сандықтас, Сандықтас,
Атамың қонған жайлауы,
Қайнардай сұы қайнауы,
Шалтынға жонын кемілтіп,
Құлынды қазық байлауы [12, 81].

Замана жайын толғаған Дулат қаншама күнірекенмен, тұған жерінің тағдырына құрсіне отырып, құдікпен қарай алмайды. Мұндағы оның қарайлайтыны «Адал бекзат, туысым» дейтін өзі сенім артатын замандасы мен «Жетімдіктің белі-нен асып өтер» жас өскін. Дулат сеніміне қуат беретін де солар. Әрине, Дулат келешектің кемел шағына жетер жолды дәл нұқсап берे алмайды. Бірақ сол сүрлеудің сұлбасын шырақ жағып іздер жандарды көре біледі. Дулаттың өзін де осы қатар-ға қосуға болады. Өйткені ол да сол шыракшылардың бірі. Оның біз Дулаттың ақындық пен ақындық міндетті түсінінен пайымдаймыз. Ақын аңы сынын да, өлендегі ойдың да мәнін өзі ашады, міндеттін өзі түсіндіреді:

Қайырыз сарап малдың да,
Еріншек есер жарлың да,
Халыққа емес сиымды –
Парақор баспақ биінді,
Ел бұлдіргіш бегінді
Әперіп сөзбен кегінді –
Улы тілмен уаттым.
Сана қүйіп ойыңа,
Қуат беріп бойыңа
Аққан жасы сел болған,
Етегі толып көл болған,
Беріш болып шері байланған,
Үйқы беріп, қайты алған,
Қайырынды уаттым [12, 62-63].

Ал мақсаты не?! Бұған жауапты ақын өзі береді. Оның кейінгі шәкірті Абай сынды «Мақсұты алыс». Мақсат – елін алға жетелуе, алғы күннен жоқ іздету.

Сусаганды сулатып,
Шаршаганды куантып,
Кезегенді тұра атып,
Жырыммен елді жетелеп,
Мүніс жерден төтелеп,
Атылайын ақпандай [12, 63-64].

Дулат ақын артық мақтанның, жалпы өнер қонған жанға тән өрікпеген көнілдін адамы емес. Ол – өзінен жоқ іздеген жоқшы жан. Өзіне-өзінің көнілі толмау, кім-кімнен де табыла қалар мінез емес. Ол Дулат сынды, Абай сынды дара туған даналардың ғана қолынан келер қас мәрттік. Кемшілікті өзгеден емес, алдымен өзінен көру, «Біреудің басындағы шоқты емес, өз басында отты» байқау, кез келгенге кона кетер «бак» емес. Дулат ел жағдайы мен халық қасіретіне өзгені кінәлай бермей, өзін де кінәлінің бірі сезінеді. Жеріне жеткізе айта алмай, «замана илеуінде» кеткендей сезінеді кейде ол өзін. Өзінің міндеттін дұрыс атқара алмағандай, күдік қеүлейді қеудесін. «Сөзім бар да, көзім жоқ» деп өзіне өзі қайтарылып ап ақын:

Күнәм жойқын, тәубәм аз,
Тіршіліктен не талтым.
Дүние-жемтік, мен тәбет,
Соны бақтай, не бақтым.
Бырылдастып әркіммен,
Не қапқыздым, не қаптым [12, 105]. –

деп өзіне өзінің көніл толмай, ел кәдесіне жарадым ба деген күдікті ойдың қылан өзгер тұстары ақын мақсатының зор, міндеттінің ауыр екендігін айқындаста керек. Дулат ақындығындағы шыншылдықтың күәсі осы ма деп қалғандайсың. Ғалым X. Сүйіншөлиевтің: «Дулат өзі жасаған заманға, отаршыл зорлығына, ол қауымға қызмет еткен әкімдерге, аға сұлтандық билікке түбегейлі қарсы шыққан халықтың тәуелсіздігін көксеген әрі құрессер, әрі реалист ақын» [17, 327], – деген тұжырымын осы тұргыдан қабылдағанымыз жөн.

Дулаттағы құрессерлік үннің айбынды шығар тұсы – ел намысын жану. Ақын оның екі жолын таңдаған. Оның бірі – елдін өткенін еске түсіріп, кеше қандай мен бүгін қандайды салғастыра көрсету. Екіншісі – жас ұланының жігерін қайрау, елін сүйген, ел азаттығын арманының зарына айналдырап азатқа тән қасиеттерді бойына сініру. Тағылым мен тәлімге табындыру.

Дулат – ескіден қалған сөзді жанғыртуда өзгеше бір шабытқа ие дүлдүл ақын. Ондай толғаулардағы ой мен сөз иықтасып, қатар ойнап, жымдастып кетеді.

Ақсақ Темір көреген,
Азуын айға білеген,
Дүшпанын саздай таптаған,

Досын майдай сақтаған,
Алтын діңгек секілді
Патша өткен Тұранда [12, 98].

Дулат сонымен қатар елдің иек тірер азатына жүртіның мият тұтарлық тұлғасына айналған өз замандасын да тап басып танып, оның ел алдындағы абырайын арттырып, алдын кенге салдырып отырады. Мұнда да төгілген жыр, акпа өлеңге жолығамыз. Ондай толғауларда Дулат өлеңі ерекше бедерлі шығып, бейнелі сөздер құйылып түсіп жатады. Ол «Жібек жіп – сөзден» сұлу өрнек тоқып, «кесте жыр» төгеді. «Сүлейменге» өлеңінде осы үрдіс айшықты көрініс тапкан.

Аруақтың артқы сарқыны,
Адал бекзат, туысым,
Айбарыңды байқасам,
Алтын зерлі түтімсін.
Ауыл-аймақ, көршіге
Алтынның айшық туысың...
Қас дүшпага қарасаң,
Қан шыңпас тастай түйінсін,
Ел қамын жеген ер болса,
Сабазым сендей қүйінсін.
Сырга берік сырбазым
Ашуын таппас қынысың.
Бирақ жалған қайтейін,
Мезгілсіз келіп дүниеге,
Аптаңа түскен басың бар,
Жау айбынар досың жоқ,
Жар- жапсарда қасың бар
Жылайсың да шыдайсың [12, 179].

Ақын сомдаған Сүлеймен бейнесінен біз ел қамын жеген ерге деген сенімді көреміз. Және осы өлең Б.Омарұлының «... қазақ ақындарының ішінде жазба әдебиеттің аса көркем үлгісінің негізін қалаған жырау бар. Ол – Дулат Бабатайұлы» [18, 44], – деген тұжырымының нақты дәлелі.

Жоғарыда атап өткеніміздей, Дулаттағы ата-баба жерін, Отанды қорғау тақырыбының ашылар тұсы жас ұрпаққа үміт артар тәлімдік-тағылымдық сарындар. Оның ұғымында келешектегі кеңшілік пен еркіндік бүтінгі қабырғасы қатыған жас баланың тәрбиесі мен тәліміне тығыз байланысты. Ақын ертенді бүтінгіден күтеді. Сондықтан да біраз өлеңін жас өсінге арнайды. Намысты қамшылар, рухты аруақтандырап құдіретті жол да соларға арналған өлең еншісінде.

Ту ұстап, тұлпар жаратпай,
Алдынан топ таратпай,
Елді аузына қаратпай,
Жай отындей оқ таппай,
Анадан тудым дегенмен,
Бастамаса ел, ұлан ба? [12, 98].

Ұрпаққа қойылар міндетті ақын осылай түсіндіреді. Ел ұланының міндеті ел тәндігін ойлау,

елін жаудан қорғау. Одан өзгесі күйкі тірліктің – күйбен тіршілігі. Азаматтың азамат болмағы ел қамын ойлаудан өріс алуы тиіс. Дулат ақын ұсынар тағылым мәйсігі осы. Әсіресе бұл оның «О, Ақтан жас Ақтан жас» өлеңінен айқын танылады. Бұл өлең Дулаттың үміт отының маздап жанар шамшырағы.

О, Ақтан жас, Ақтан жас!
Сен де жетер ме екенсің?
Жетімдіктің белінен
Асып та өтер ме екенсің? [12, 76], –
деп сұрай арнаумен басталған толғау,
Жетімдіктен өтерсің,
Шаң бермей әлі кетерсің,
Қажыма, Ақтан, қажыма
Жетерсің әлі жетерсің [12, 77], –

деген нық сенім, үлкен үмітпен аяқталады. Бұдан нені байқаймыз деген ойға қалсақ, ақын үмітінің тірегі – кейінгі ұрпақ екендігіне көз жеткіземіз. Ақын өзі тенденс ел азаматтарының айтқан ақыл, шерткен зарының нәтиже береріне сенімі мол. Ақын жас ұланға:

Бадана көз, тоғыз тор,
Сауыт киер ме екенсің?
Білтелінің тұтатып,
Тұтінің үзбей оқ атып,
Жау қашырап ма екенсің!
Тұлпар атты жаратып,
Бежін ерді ерлетең,
Жорықта жортып терлең,
Сырты қырлы, жузі алмас,
Салған дағы жоғалмас
Сапы асынар ма екенсің? [12, 77] –

деп, қайырыла отырып, оның ертеңгі ержеткен тұсындағы елім деген ер болған кезінің бейнелі суретін жасап отырғандай әсер қалдырады. Бұғінгі жетімдіктің бұғаудыңда жүрген жас пен отаршылдық құрсауындағы халық символдық тұрғыдан жымдастып, ертеңгі нұрлы құндердің елесі кіргіп кеткендей. Ақынның Ақтан жасты қайрауы да осыны мен-зегендей. Ақтан бұғінгі:

О, Барак, Барак жас,
Жегенге тең, ішсек мас.
Жақсы болса ұлығы
Өз елін жаудай таламас [12, 67], –

дайтін, бейнесі пернелей берген Барак емес, оған деген ақын ықыласы айрықша, Ақтан бостандықтың бұғінгі үміт шырағы, болашактағы алауға айналар алып жалыны. Дулат символизмінің мәні осында.

Ақтан:

Төсекте жатып керіліп,
Түзге отырса ерініп,
Аяғын буган койға ұсан,
Мойның ұсынып беріліп,
Қол созбайды азатқа [12, 112], –

деп сипатталатын «Төртінші біреу» емес, ол – ақынның сенім күші. Дулаттың жас буыннан тілер басты тілегі «азатқа қол созған ұлан» бола білуі. Азатқа қол созу еркіндік жолындағы күрес-ті мензеп тұр емес пе?! Бейнелі образдың ар жағында үлкен күрестің белгісі қол бұлғап тұр.

Дулат ақындығының өзгеден оқ бойы озық тұруының басты көрінісі – оның өзіне дейінгі және өзі тұстас ақындардың ішінде отаршылдықты бірінші болып барлық болмыс сипатымен ашып көрсетуінде. Сонымен бірге оған деген қарсылық үнін алғашқы болып айта алуында. Ол бүтін қазақтың қамын түгел ойлай ой айтқан ақын. Сондықтан да кеңестік идеологияның белен алып тұрған кезеңінің өзінде Дулаттың жоқшысына айнала білген тілші-ғалым К. Әміроліевтің «Дулаттар – отаршылдық езгіге түскен халықтың ұлттық ар-ұжданы» [19, 26] дегеніне келіспеуге болмайды. Жоғарыдағы біз талдаған Дулат өлең-дері оның шығармашылығы туралы айтқан К. Мә-дібайдың мына тұжырымын жоққа шығармайды: «... орыс отаршылдығы бар ойранын салып жатқан уақытты көзben көрген Дулат – сол дәуір туғызған зар заман әдебиетінің аса көрнекті өкілі» [9, 115].

Дулат шығармашылығына отаршылдық дәуірдегі қазақ жұртының тағдыр-талайының шындығын алғаш ашқан ақын ретінде қарауымыз керек. Ал шындық қашанда бағалауға, бағалау алға ұм-тылуга жетелері хак. Қорыта айтқанда, Дулат – ұлттық сананы оятуға үмтүлған, елдікті жырлап, бірлікті толғаған, ерлікті айтып, отаршылдықты сынаған, өз ұғынғанын ұлт санасына ұйытуға үмтүлған ұлттық рухтың ұлы жыршысы. Ол бос-тандық келер күнді шығар күндей ансаған, азаттықтың бозала танының боз даласына нұр құяр сәтіне сеніммен қараған, тәуелсіздік сарынның тұнғыш ақыны.

ӘДЕБИЕТ

1. Әуезов М. Әдебиет тарихы. Алматы: Ана тілі, 1991. 240 б.
2. Омарұлы Б. Зар заман поэзиясы. Алматы: Білім, 2000. 368 б.
3. Кадиркулова Г. К. История Казахстана. Алматы: Қазақпарат, 2003. 320 с.
4. Марта Олкотт. Қазақтар. Стенфорд, 1987 / Есманғамбетов К. Қазақтар – шетел әдебиетінде. Алматы: Атамұра-Қазақстан, 1994. 240 б.
5. Досмұхамедұлы Х. Аламан. Алматы: Ана тілі, 1991. 176 б.
6. Сүйіншәлиев Х. XIX ғасыр әдебиеті. Алматы: Ана тілі, 1992. 360 б.
7. Қазақстан Компартиясы Орталық комитетінің 1947 жылғы 21 қаңтардағы «Қазақ ССР Ғылым академиясының Тіл және әдебиет институтының жұмыстарындағы саяси

өрескел қателер туралы» қаулысы // Социа-листік Қазақстан. 1947. 1 ақпан.

8. Қекішев Т. Санадағы жарапар. Алматы: Қазақстан, 1992. 264 б.

9. Мәдібай Қ. Зар заман. Алматы: Қазақ университеті, 1997. 160 б.

10. Қойғелдинев М. «Оян қазақ» және тарих шындығы // Ана тілі. 1990. 9 тамыз.

11. Мұқанов С. Қазақтың ХVІІІ–XIX ғасырлардағы әдебиетінің тарихынан очерктер. Алматы, 1942. 1-бөлім. 248 б.

12. Бабатайұлы Д. Замана сазы: өлеңдер мен дастандар / Құрастр., баспаға әзірлеген Қ. Өмірәлиев. Алматы: Жазушы, 1991. 160 б.

13. Негимов С. Ақын-жыраулар поэзиясының бейнелілігі. Алматы: Фылым, 1991. 200 б.

14. Әүезов М. Қазак әдебиетінің қазіргі дәүірі // Әлем. Алманах: Өлеңдер, очерктер, әңгімелер. Алматы: Жазушы, 1991. 496 б.

15. Дүйсебаев І. Ғасырлар сыры. Алматы: Жазушы, 1991. 192 б.

16. Шаріп А. Қазақ поэзиясы және ұлттық идея. Алматы: Білім, 2000. 336 б.

17. Сүйиншәлиев Х. Қазақ әдебиетінің тарихы. Алматы: Санат, 1997. 928 б.

18. Омарұлы Б. Бұғауга бағынбаған жырлар. Алматы: Ана тілі, 1998. 112 б.

19. Өмірәлиев Қ. ХVІІІ–XIX ғасырлардағы қазақ поэзиясының тілі. Алматы, 1970. 320 б.